



UNIVERSITÀ
DEGLI STUDI
DI UDINE

ARLeF
^^ AGENZIE
^^ REGIONÂL
^^ PE LENGHE
^^ FURLANE
^^

COMUNICÂT STAMPE + foto

Incuintri a palaç Florio jenfri il retôr Compagno e il president Zanon

SINERGJIE ARLEF E UNIVERSITÂT DI UDIN PE VALORIZAZION DE LENGHE FURLANE

Presentade la convezion jenfri i doi ents che e rinfuarcîs
la colaborazion tai setôrs sientifics e di ricercje

Udin, ai 15 di Otubar 2012 - E je stade presentade vuê, te sede de Universitât di Udin a palaç Florio, la convenzion stipulade tra l'Ateneu furlan e la ARLeF-Agenzie regionâl pe lenghe furlane in materie di tutele de lenghe e culture furlane. Te suaze di un acuardi bienâl i doi ents a colaboraran par inviâ azions di caratar organizatîf, aministratîf e gjestionâl par atuâ une ativitât integrate di promozion de lenghe furlane cun particolâr riferiment ai setôrs sientifics e di ricercje.

"Chest acuardi - e à sotliniât il retôr Cristiana Compagno – di une bande al à valôr politic e di chê altre al puatarà risultâts operatîfs aes dôs istituzions. La colaborazion, che e esist di cuant che e je nassude la ARLeF, cumò e vignarà infuartide e consolidade in grazie di une profonde sinergjie. In chest particolâr moment al è necessari il plui grant coordinament par fâ masse critiche tes liniis di valorizazion de lenghe e culture furlane. L'obietîf de convenzion al è ripuartâ i sogjets che a lavorin cun buine volontât e competence tal setôr de tutele de lenghe furlane sot il coordinament sientific de Universitât e de ARLeF cence dispierdi cussî risorsis e energjis. Si à bisugne di un coordinament unitari dal pont di viste sientific e di ricercje e di un impegn che o vin di meti in cjamp in maniere continuative".

La convezion e proviôt la istituzion di un Comitât paritetic ARLeF-Universitât dai Studis di Udin che e varà il compit di davuelzi une stabile ativitât di coordinament tecnic-sientific te programazion des azions comuns di puartâ indevant pe tutele e promozion de lenghe furlane. A fasaran part dal Comitât il retôr e il diretôr gjenerâl de Universitât di Udin e il president e diretôr de ARLeF.

"Cheste convenzion cul Ateneu furlan - al à evidenziât il president de ARLeF Lorenzo Zanon - e rispuint ae finalitât proviodude dal Statût de Agenzie che e à il compit di favorî la colaborazion jenfri organisims che a operin pe cognossince, difusion e valorizazion de lenghe furlane. E sarà duncje une ulteriôr oportunitât par coordinâ iniziativis di studi, ricercje, divulgazion che a vedin par finalitât il svilup de cognossincis in materie di tutele dal patrimoni linguistic. De sô bande l'Ateneu furlan al à bielzà dât il prin segnâl concret di colaborazion concedint in comant ae ARLeF un sô dependent che al podarà cussî jessi il leam operatîf tra lis dôs istituzions".

Ae presentazion al è intervignût ancje Giuseppe Napoli, vicediretôr centrâl Relazion internazionâls e comunitariis e responsabil dal Servizi coregjonâi tal forest e lenghis minoritariis de Regjon che al à ricuardât l'impuortant percors inmaneât par ospitâ in Friûl la Agenzie europeane pes lenghis. Une candidature che e à vût la aprovazion de retôr Compagno.



UNIVERSITÀ
DEGLI STUDI
DI UDINE

ARLeF
^^ AGENZIE
^^ REGIONÂL
^^ PE LENGHE
^^ FURLANE
^^

Tal cercin de convenzion e je proviodude ancje la istituzion dal "Servizi ARLeF-Universitât dai Studis di Udin pes ativitâts di ricercje su la lenghe furlane "finalizât a costituî un stabil strument di racuardi fra lis ativitâts di ricercje e promoziun linguistiche dai doi ents. Tra i compits dal Servizi a son proviodûts la assistance ai orghins di plui alt nivel dai ents che a partecipin ae convenzion par davuelzi ativitât di ricercje, politiche linguistiche e gjestion amministrative; davuelziment di periodichis ativitâts di analisi e verifiche des ativitâts di ricercje su la lenghe furlane; il scandai e la verifiche des azions proviodudis dal plan anuâl di politiche linguistiche de ARLeF; la colaborazion te programazion di iniziativis culturâls a favôr de lenghe e de culture furlane ancje in comunitâts furlanis che a operin tal forest e in colaborazion cun altris istituzions.

Il delegât dal retôr pe valorizazion de lenghe e culture furlane, Federico Vicario, al à ricuardât che "la coesion e la concuardie a son, di simpri, valôrs impuartants pe comunitât furlane. L'esempli che ARLeF e Universitât a dan cu la stipule di cheste organiche convenzion di colaborazion, al è chel di crodi in chei valôrs di coesion e di concuardie, cirint cun spirt di servizi lis miôrs strategjiis pe promoziun e valorizazion dal patrimoni linguistic dal nestri Friûl. I progjets, impuartants e di prospetive, a son: nô o cjapìn l'impegn di realizâju, tal rispjet de diversitât di mansions e competencis".

dott. Elisabetta Pozzetto
Regione Autonoma Friuli Venezia Giulia
ARLeF – Agenzie Regionâl pe Lenghe Furlane
Piazza XX Settembre 23
33100 Udine
0039 0432 555724
www.arlef.it

AREA RELAZIONI ESTERNE
Ufficio comunicazione, stampa e web
via Palladio 8 – 33100 Udine
Addetti stampa: Stefano Govetto, Francesca Pelessoni, Silvia Pusiol
0432 556276/70/71
e-mail: ufficio.stampa@uniud.it
Ultime notizie: <http://qui.uniud.it>